

榮  
性  
堂  
集

唐制士登甲乙科而以才望著聞者節度使辟爲判官書  
記錄事諸職久之薦擢尙書郎御史裏行之屬然後迴翔  
臺閣出理大藩者見於唐書不可勝紀讀其詩亦可攷而  
知蓋其人才兼文武故能內贊廟謨外叅戎政亦不僅絺  
章繪句爲能事也吾友吳君曇繡自少以文行著東南及  
其入內閣直軍機才華所播浸受主知由是典試楚

中督學滇省聲名籍甚某年丁憂家居值福文襄郡王督  
閩浙過吳聘以偕行嗣文襄移節兩粵有事於安南君復  
與俱葢古書記叅軍之任也事歲擢廣東糧道生平經歷  
往往見之吟咏而君初不以此自矜今粵督覺羅吉公與  
君同事內閣及公以協辦大學士總督兩廣愛君詩趣之

雕板雕甫竟而君適晉山東布政司于是函其集索序于  
余發而讀之其詩清新古峭若冰弦玉柱臨風而戛擊也  
若織文衣錦照日而光輝也繇君所歷之境山海重阻而  
軍容荼火之盛隱約發現於行間是以其奇如此初余自  
四川還朝始識君于京師并讀君之詩時君已值內  
廷知制誥走筆飛書觀者動色而南交內款亦君襄贊  
之力爲多比在粵東由糧道遷按察司平反出入使民懷  
更畏則詩又君之餘事矣君雖不以詩自見然星光貝氣  
炯炯然常若有干霄而上者較之唐時參軍記室固已邁  
于杜牧李商隱之倫卽置身通顯亦當不減于高適嚴武  
矣比者君新承寵命開藩齊魯輜軒所至覽河岳之

崢嶸撫閭閻之繁庶詩篇增富當有進于是者余雖歸老  
衡茅猶能爲君序之嘉慶六年十月青浦王昶書

文田自束髮時卽知曇繡先生名後從親串僅一見之及  
文田膺鄉薦入薇垣幸得稱後進而先生已以尙書郎出  
秉憲嶺南未能親接緒論然於京師交游間見先生詞翰  
未嘗不憊然服也茲歲八月文田奉 命典粵東試旣竣  
事始與先生數相見因得請已刻詩集而讀之力大而思  
精神清而趣遠其初實導源漢魏後乃汎濫諸家極之於  
蘇黃而止爲詩千三百首而作者之體備矣先生學力旣  
深邃又扈從灤陽視學滇池校文江漢其在嶺南也以狎  
苗肆擾粵西曾親率師往戡定之凡輜軒戎馬蹤跡之所  
經見聞之所及無一不發之於詩故其學之益大而肆也  
如是昔太史公足跡遍天下爲文疎宕有奇氣然初未有

事行間張燕公詩得江山之助又出於遷謫故詞多悽惋  
先生遭際盛時敷歷中外其蘊蓄也厚而壹皆出之以  
和平蓋歌咏流傳且將與皇華四牡采薇出車並存豈止  
入作者之林而已也讀既竟謹書此數言以復之嘉慶庚  
申九月既望歸安後學姚文田拜手敘

作詩而至言情難矣作詩而至隨時隨地各如其情則尤難矣本朝以詩名天下者首推漁洋而其與敵則惟竹垞竹垞而外如洪昉思吳修齡類能樹幟吟壇擅名吳越自後雖有作者亦幾難於嗣響矣平江曇繡方伯生而拔穎善工詩所著有榮性堂集一編備載古今各體詩千三百首舉凡懷人寄興感物興歌與夫京外供職帷幄從事莫不各隨其時與地之所值以寫其憂思抒其忠藎發其經濟是何如胸次哉殆亦善於言情者矣夫人惟深於情者乃能以超乎情之外曇繡之詩不止爲詩而并有通於禪詩不入禪理終非精詣曇繡其白言之矣讀夢幻空無之句味妙悟枯坐之言是又東坡之流亞也余復何贅雖

然雲繡不以余之無文而問序於余余縱不能深有以得其詩之旨而讀其詩真有所謂風雲吐於行間珠玉生於字裏者豈近代詩人之比乎昔白樂天稱劉夢得詩在處應有神物護持之今雲繡位日高而心益下而詩日富將見異日之傳播海內膾炙人口亦有爲之呵護者矣余愧無以爲序者顧深思而卒讀之反復而咏嘆之記其答友詩云具區三萬六千頃不及詩懷爾許寬請卽以之贈雲繡可也嗚乎雲繡可謂善言情者矣

嘉慶辛酉夏六月長白完顏瑚圖禮拜手序



余讀朱子觀心說云以心觀物則物之理得非塊然兀坐以守其炯然不用之知覺也又嘗讀程子定性書云所謂定性者動亦定靜亦定定則明明則非應物之爲累也予於二子之言得爲詩之道矣蓋詩以言志志者心之所之心能觀物則知覺愈靈故詩可爲心之聲也詩以陶情情者性之所見性能常定則動靜皆明故詩又爲性之發也榮性堂詩集之義其在斯乎蠡濤吳君年十九登吳下賢書壬辰舉進士予亦以辛卯進士爲農部郎時君侍直樞庭予慕其名而頗竒其貌偉其才而未見其詩也夫士不聞名山大川窮兩間之竒奧則無以遂其曠達磊落之胸抑學不窺古經遺典博萬象之臚陳則無以發其藻繪晶

光之氣越三十年而得蠡濤詩集於二東且簿書民物之  
暇唱和珠泉鵲湖間因其詩而知其所學因其學而知其  
所以爲官夫乃嘆物而不化非學也華而不實非詩也詩  
浮而夸非性也詩冷而苦非榮也是編落落成一家言藝  
以書實小中見大吸盡西江海一漚其蠡濤之謂乎予讀  
百日竟其卷始爲之序

嘉慶七年歲在壬戌午月年愚弟和寧撰

榮性堂集目錄

卷一

古今體詩一百首

卷二

古今體詩九十四首

卷三

古今體詩七十九首

卷四

古今體詩五十四首

卷五

古今體詩八十四首

卷六

古今體詩七十首

卷七

古今體詩一百一首

卷八

古今體詩六十五首

卷九

古今體詩一百三首

卷十

古今體詩六十九首

卷十一

古今體詩七十九首

卷十二

古今體詩九十九首

卷十三

古今體詩七十三首

卷十四

古今體詩六十九首

卷十五

古今體詩八十二首

卷十六

古今體詩七十一首

榮性堂集卷一

吳縣吳俊曇繡

古今體詩

短歌行

茫茫瀛海浩浩神州按劍高歌寫我煩憂

解一

百年易盡東

方未央雄雞三號太白煌煌

解二

西鄰烹羊東家宰牛山人

勸酒無令白頭

解三

東陵墓田松栢爲薪不見子孫但見荆

榛

解四

兔絲女蘿纏綿不已明月入戶思心千里

解五

桂則有

芳不由春風蘭則有秀孤生谷中

解六

翩翩黃鵠比於鴛鴦

弋人篡之高舉雲霄

解七

擬古三首

涉江懷美人芙蓉映秋水兒鴈聚沙洲打槳西風起豈不  
欲行邁長路阻修軌臨流曄宿莽俯見雙文鯉緘成尺素  
書寄言無摧毀明月何高高流光懷袖裏

相思不成寐日暮乃孤宿寒衣襲蕙芳迢遞沅湘曲夕露  
一以淒長河炯可掬思君美無度感此蕭蕭木川原阻且  
深舟車不可屬願爲黃鵠飛翔鳴薄朝旭

涼秋八月慨傷與誰同出郭門直覩白骨蔓草中黃蒿  
似人長蕭條起悲風海水從西來焉能測始終吁嗟人命  
促日暮傷途窮寒夜聞鬼嘯那知非英雄輾轉不成寐惻  
惻傷我衷

古劍篇

我三尺鐵霜鏢冰雪肌磨以仁義禮淬以忠孝慈瓜皮  
溜風雨鏽色愁妖魘薛歐不在世誰與相扶持空堂滴水  
氣敗壁號陰颼彼夔兮一足豺狼兮形形有劍不敢佩吾  
其如爾爲

蒿里曲

磊磊山下松落落松間月下有百年墓荒荒薇與蕨萋萋  
腰繫金今茲蔓縈骨白日沉西山奄忽不再還吁嗟一坏  
土何啻隔九關一歌淚沾臆再歌頭雪白泉上與泉下苦  
樂衆所悉泉上寧不樂所貴有令德

董嬌嬈

當壚誰家女有似董嬌嬈年可十七八顏色少且妖身材

既端正肌肉亦豐饒步搖珠的的出語氣和調下面青羅帶上頭翠雲翹使君何方來一見心神搖手持黃金釵願言諦漆膠一股連理樹一股鴛鴦巢長跪謝使君使君勿見疑君家好門楣照耀衆所知賤妾侍枕席阿誰謂不宜鴛鴦有故侶連理有本枝安能割團圞而來配差池使君遠方來盡此手中卮必欲相逼迫含淚訂前期使君未娶日賤妾未嫁時

塘上行

蒲生水中央託根何微茫賤妾上君堂已自承容光前日爲君婦後日捐空房空房復何有縷縷紅絲箱人言舊人好君道新人長新人且勿笑舊人且勿傷妾心鎮不移君



心自裁量

行路難

吁噓乎泰山坦坦蜀道平一心兩意殊陰晴又無秦時照  
膽鏡雖有熱血向誰傾朝爲刎頸暮則足麗涓孫牘日相  
逐未央宮中烹功狗廣武殂上分翁肉世事紛紛何足云  
與君盡此樽中綠

楊柳枝

金閭門外水拍城鴉鳩啼罷百舌鳴吳王宮北醉行客草  
色年年自深碧女郎按拍楊柳枝陽春起舞白紵詞青山  
欲暝五湖暮雨絲風片弔西施

君馬黃

君馬黃我馬白兩馬尋常時逍遙散草澤一朝黃馬金絡頭旋蹄尚嫌阡陌窄黃馬見白馬意氣非疇昔微嘶作周旋徑去路辟易白馬見黃馬相嘲似相惜據鞍誰家子甘心受箠策

蘇門楊柳枝詞

蘇門三月楊柳絲麴塵十里春風吹春風飄雨含煙樹鵲鵲啼斷桃花渡桃花浪暖青於油吳娘攄笛坐船頭燕語逢迎簫鼓隊衣香浮動珠簾鉤珠簾窈窕鎖日垂對岸青山鎖黛眉采香湓畔采香客冶游堤上冶游兒請君勿言吳王事聽我起唱楊柳枝楊柳枝千萬條送盡行人去馬遙淡黃淺綠金亭路烟絲霧態美人腰長短復長短參

差復參差吳宮日落烏栖時一種含愁那得知

幽州馬客行

虬鬚紅帟首霜鞞鐵襖襠能作郅支語醉倒燕姬旁  
養駒高七尺朝出居庸關秋風臂鷄子掣絲去復還

自君之出矣

自君之出矣庭院閉深深春風太輕薄飛絮落重衾  
自君之出矣荷芰送新涼妾似菱花鏡君心明月光  
自君之出矣秋色滿河干夢歡夜來宿歡去繡襦寒  
自君之出矣獸炭不添鑪郎意知深淺門前雪有無

企喻歌

男兒事報讐千金換名馬落日風蕭蕭殺人長城下

襄陽蹋銅蹄

門前襄陽路春望望大堤認是郎來處花落蹋銅蹄  
白馬黃金勒笑面迎如花看郎如漢水流去不還家

折楊柳歌詞

楊柳何青青攀折帶煙霧春風爾相識送郎天邊去  
郎去幾時歸垂垂空亂絲今年折柳處明年腸斷時

車遥遥

車遥遥車中人車下草草春榮而秋枯人昔壯而今老  
車後塵不相離車前馬迎風嘶馬有四蹄天有四時四時  
尚往復馬蹄不躊躇

久別離

久別離經歲年心如車輪不肯住朝朝暮暮黃埃邊百年  
亦頃刻人命無金堅將金埋土千歲滅何況閨中夜夜愁  
心煎別時楊柳青青浮拍天今時容顏老蕩子不言旋  
東家娶婦復生子子騎竹馬來門前嗟我十年空房裡遠  
望尺素空雲煙妾如水底石郎似風中綿風吹柳綿任飄  
蕩水中磐石鎮不遷不怪柳綿太輕薄却怪東風忒自顛

### 新嫁娘

三日尚掩面五日出堂前低看阿婆面佯問小姑年

### 篋篋引

黃河一曲一千里篋篋一鼓一淚珠清朝刺船下沙瀨若  
有人兮披髮而提壺妻向前頓足牽挽奈之何渡河不返

使我愴惋而嗟吁上不見青天下不見平地盲風勞刁怪  
雨陰異巨鼇潛藏迅濤澎湃吁嗟河兮不可以泳游舟楫  
顛倒篙師愁渡河而死白骨當誰收我思公兮胸填憂爲  
公拂淚彈箏篴

塞下曲

一聲刁斗甲光開大將弓彎漢月來行過祈連盡回首  
髑髏十萬李陵臺

傳烽幾日渡河湟六月天山夜雨霜閒卧沙場賭身手馬  
前射殺左賢王

哀角三更臥鐵衣單于新道赫連歸山前甲士頭齊痛營  
裏將軍健欲飛

防邊直到海西頭南下河源凍合秋若使功成名姓在一  
軍瘡病盡貔貅

少年行

何難一博覓封侯且作江湖十載遊報讐結客等閒事立  
談先贈鸛鷗裘

無家有膽黃金賤匹馬堂堂進國門亡命籍中名字在末  
將騎射報君恩

同平遠林哲侯章侯昆仲常熟黃金臺游滄浪亭歸  
集春風亭夜話分賦得浪字

潁陽頓西塢素雲霏崇岡煙叢猶冒綠霜林已委黃素心  
在晨夕逸興遨滄浪亭空野逾曠水緩陂彌長風流緬自

昔樂志徵未央言歸撫蘭酌以詠傾瑶芳多謝同懷子情  
款結中腸貧交依性命貴游輕驢驢耦俱洵無猜永好難  
可量無爲滯游宴努力愛景光長安古云樂北望各騰驤

秋杪周漪塘琴清閣讌集

潛虬媚幽壑翔鳳麗穹旻亮懷執高節元眊指靈辰粲粲  
霜後菊獵獵風中蘋崇巘有華木溫源無寒鱗江東盛文  
物懷抱抒清真握蘭泛元醴紉蕙承華茵睠茲清夜月言  
詠西園賓構材榲楠美琢器珎瑤珍積懷慶時懋撫化覽  
物伸密林鳴好鳥仁門依德鄰夙有耿介志無爲淹泥塵

題清夏山莊畫冊

暑氣變清涼光景屢明晦煙叢暮紆青雲峯曉浮黛中有



避喧人結茅契沉遐泉聲不出戶林巒如負戴了了見村墟  
寥寥辨鳴吠何處寺樓鐘蒼茫隔烟曖

涉園六咏

小鬱林

蒼梧非云遠寒翠生竦竦主人巴蜀歸老向此中居丹砂  
自生暖不用貂襜褕

晴雪軒

一徑落桐花瑤琴不知處林臥清道心封此欵關路如聞  
幽澗泉步屨時來去

蜀芳亭

三月錦官城花開風雨作飄泊幾何年來此小亭閣風前

咽杜鵑猶云歸去樂

藤花舫

曲檻與明櫺風輕掠雙燕扁舟帆櫂無終日風波善瓔珞  
自垂垂亭午好開宴

浮紅漾碧亭

菰蔣雜風雨袷衣不勝薄清川息游魚芙蓉自開落欲持  
鐵如意招下雙白鶴

觀魚檻

遠岸發葭菼水面飛青鷗堂堂復策策十百游文漪寄語  
任公子慎勿一來窺

梅花九首和青邱先生韻

合是菩提掛鏡臺衆香國裏許先栽竹園煙暝携琴到莎  
岬霜明放鶴來羽客有家多薜荔玉妃無宅不莓苔掀蓬  
圖裏香魂護一半冰姿逐水開

月下相逢姑射仙斷岡連壑蘚痕緣枝剛踈處微添雪蕊  
未勻時欲暈煙鴉噪古原殘照裏鹿鳴幽草亂峯前故人  
大有騎驢興遠隔蘆花渺渺天

入夜清吟水閣頭孤山神韻欲全收殘燈紙帳聽鐘院古  
渡橫塘載月舟澹到不言香欲瀉瘦如無力冷含愁翠禽  
嘈夢羅浮曉記取仙人此夜游

夢破春回不著痕千株南國最清溫偏宜月下蓬蒿徑遙  
隔溪邊竹樹村想見世尊持寶偈由來仙子有香魂道人

冷淡今何處落葉蕭條正掩門

仙裾狼籍水雲宮  
莎岬橫橋冉冉風  
悟得影形形便影  
看來空色色皆空  
五更鐘動浮嵐外  
一線泉流古木中  
清絕生涯原是夢  
不成村落兩三叢

何曾半點著埃塵  
遠寄迢迢尙有人  
氣冷不妨微被酒  
林疎何處可藏春  
水邊忽訝明珠出  
日暮低翻翠袖頻  
官閣年年消息近  
祇須料理苦吟身

春前春後只依依  
雲霧爲容雪作輝  
薄暝山塘橫遂過  
嫩寒驛路野禽飛  
爲邀半面臨風得  
不放全身隔樹稀  
馬上恩恩饒一見  
殘僧獨白打包歸

陶洗鉛華合向陽  
忽聞搖落冷江鄉  
林昏是處施綃薄  
泥

滑何人瘞玉香遼海月明天漠漠苑臺魂化夜荒荒知君  
不管相思苦作意先春冒雪霜

芳心未許蝶蜂知真占人間第一枝密雨疎煙勞悵望殘  
山剩水有相思稍稍委落珠鈿夜屑屑拋荒玉珮時多謝  
山人頻折贈暮雲樓閣好題詩

旱久大雨

祝融夜泣耕父死坤圻踴翻老蛟起雷君出裝鉦鼓鳴力  
鞭銀龍出海底水晶鉢躍寶伽兒有隱其頤反齧齒連尻  
結股十萬萬黑螭纏腰盤骹觚或持長笈慕六駁或捎青  
幢跨水兕羸羸駮商風馬馳趨趨暝走須彌徒喝起滄波  
十五鼇擎開三山潑海水蜃樓倒掛日睽暘電光礮礮海

若喜修羅之兵強復強虹旃蜺旌光薺薺地廬帖妥天宇  
寧高閭巖嵯奏宮徵飲烽醕鼓樂樂胥洶洶旭旭動陞彤  
部曲箕張太一闌神蚪高翔蠃蠃耳上帝不嘉屏翳黝黃  
公醜酒鯨作餌勅使項冥迴戈旃珥節頗轉曰至止須臾  
阿香收鼓聲水氣薄日暈頰紫

庭前怪樹歎

草堂怪樹醜難狀不畏譏訶與請讓篩風滲雨幾百年毒  
霧陰森足魍魎彼黠者鳥巢右枝左枝拓臂栖妖鴟或露  
零零走脫葉或日杲杲號涼颼破窓曲室小於斗作字往  
往礙跟肘雷公淬斧擲我庭着樹分明現蚪蚪半邊焦爛  
皴腹開兒曹駭汗奔喧豗猶有半身偃強立餘孽不受雨

露栽豫章之材可爲棟嗟爾那得繩墨中龍門之桐可爲  
琴嗟爾那適徽絃用詭言下有九首蛇噴涎吐霧生毒葩  
黃昏蝙蝠如翻鴉短狐伺人口射沙嗚呼何不移置酷吏  
衙猶可削作檻與枷何爲藏妖復匿鬼舉室驚擾逮犬獬  
槌床高叫無氣力敗枝落屋檐板礫殘燈勁筆向紙擲滿  
庭苔雨埋深碧

招張中翰次堂家孝廉稷堂孫秀才味根飲於樂觀  
堂余弟少甫亦在

王睢關關倉庚呼有酒不飲何爲乎開簾拂榻待客至早  
有櫻筍出我厨少華精通萬畢術駕馭龍虎飛朱符次堂爲工  
步虛吾宗筆格似祭酒九峰三泖供嬉娛瞿曇黃面忒清

昔秀才竟體煙火無吾弟能文復能飲口邊麴蘖噴璣珠  
我是長安市中客纔打毬毬告僕補竭來江東偶會合狂  
語擊碎玉唾壺酒醒客去主人臥乍有小雨鳴菰蒲

題黃一峰浮嵐暖翠圖

富春江水晴溶溶富春山色青茸茸大癡癡坐山水窟渾  
染暖翠浮嵐峰董源墨法是初祖淋漓元氣堆心胸孤茅  
山頂奏琴筑跳珠濺玉相撞春欲起不起雲窈窕高低遠  
近千芙蓉氣融墨化真宰睹但有春末無深冬吳興一生  
爲低首遠山樵徑布置工當時倪范尚迂緩泊乎近代誰  
希蹤何人千金買匹練想見供養煙雲豐菰蘆風雨釣臺  
下可許雞犬扁舟從



妹婿張湘琴以登鄧尉望太湖詩見示和而答之

東崦西崦水鶴飛梅花香中略約微短筇携過萬木頂巖  
剎三扣開雙扉枯僧守鉢澗泉凍窓中指照西施洞入雲  
深處歛篋輿稍覺詩腸自鳴動眼明雪色一千里洞庭兩  
點如螺耳龍吟鼉吼悸心魂壯觀東南在脚底人間何事  
訪十洲三萬六千環三州蕭晨已蠟謝公展浩興還挈范  
蠡舟昨者我登官長峰鵝鳩蝦簞盡附庸三十四瀆幾不  
辨濤奔沫沸相撞春山川形勢足幽幻胥口風帆小於燕  
虎山橋下漁歌喧光福塔上佛光現湖山邂逅定有期咫  
尺煙波坐渺瀰七十二峰何處所當年風雨載鳴夷

倩家秀才枚菴畫朝帆圖

却思少年在江湖野艇高歌菱苕裏歐陽公何人生不能插翅

摩天游又不能提劍剽蛟行萬里暗想五嶽四瀆幻姿態

煙霞起滅無窮已丁丁伐木作舟楫短篷斜掛松陵水多

君爲我畫朝帆直訝瀟湘翻脚底估船伐鼓聲蓼蓼空中

素旄降帝子平生眼界苦局促擊汰揚舫溯壬癸壬午秋登燕子磯發未有渡江望金山諸咏

之舟不可駕今君千里收一紙圖中或許齋糧從明朝便

把釣輪理

把釣輪理

寒食作

雜花今日老於昨生計比來薄似前竹筍亂抽十百个湖

田閒却兩三年賣餬肩擔連朝雨上塚人歸潑火天其奈

東風芳草渡漂紅如沸浪如煙

梅雨

繞徑陰陰夏木濃  
浸簾萬萬濕煙重  
墻低晚聽數聲屐  
屋僻送來何處鐘  
隔岸鷓鴣飛箇箇  
向田決溜鳴淙淙  
薄雷忽作黃昏雨  
人道西溪走毒龍

千峯萬峰暑氣鬱  
西家東家烏鬼飛  
水門亂流放船去  
夕浦起風打鴨歸  
近郭蒲葵新入市  
過牆藤竹欲侵扉  
空思湖上煙霞侶  
自倒清尊斫鱸肥

題墨隱和尚仿米南宮畫

夙昔慕山水齋糧亦孔艱  
夕陽簾櫳草堂靜  
夢游三湘九疑間  
樓觀參差不可狀  
煙巒窈窕難爲顏  
空中翠旗帝子

夢懷堂集卷一  
降浦裏明鏡估船還黃陵廟前一夜雨曉來失却湖上山  
今觀此圖無乃是游戲筆墨非塵寰南宮老去房山死嗣  
後葫蘆依樣耳謝君破我夢遊踪合喚人間活顛米

寄彭孝廉鋤雲汶上

我從首夏歸田園如蝸負殼祇觸藩繩床三足晝僵臥苦  
雨匝月茅齋昏窘迫漸漸及衣食高堂不語心自惻男兒  
跼蹐守章句突不生煙朝逮晷昨得汶陽故人書白雲紅  
樹渺愁予相思正及鴈飛候問訊還如傾蓋初君家門閥  
冠三吳卿月輝輝傍斗樞門生江上開蓮幕故吏腰間佩  
虎符今年四月燒尾宴滿路槐花落如霰鴻臚唱徹第一  
聲名字單寒人未見前三門外淨無沙暖日輕風障面紗

五城鼓吹狀元騎驪瑜紅燭尚書家

日修撰張西峰傳臚歸宴大司馬第

尚

書衣鉢詞林美一瓣宗風映桑梓愛才若渴豈徒然大厦  
由來庇寒士君今鉛槧吟官閣莫歎蟲魚心緒惡三年去  
看帝城花人道牟車重入洛悵余非釣亦非屠白蠟明  
經一腐儒千里思君逐清汝月明秋遠蜀山湖

### 題朱愚溪聽泉圖

惟目司視耳司聽樂水樂山仁知定開先鴈宕在人間何  
能洗我兩耳淨至樂不樂禮無體虛而善迎富包孕聽泉  
不必定有泉吹萬半空足鐘磬是真是幻言下領室中有  
水難持贈愚溪之愚良不愚聞根斷處聞斯瑩枕流漱石  
亦徒然好事紛紛拾餽飣

讀歸太僕所撰張貞女傳紀之以詩

安亭江口風半角合村閉門鬼夜哭空中鼓樂聲雷碾有  
火如螢旋如轂靈之昇兮翩乘雲神清揚兮曳文縠村中  
人兮陳几筵思神嗜兮薦秋菊升高望之儼來思花冠翠  
翹明煜煜爲神舞兮爲神歌神不語兮磨錢卜鄰媼尸里  
師祝神憑人言努雙口恨不生啖羣盜肉安亭先生發憤  
言一傳千秋重山嶽巾幗何殊烈丈夫蛾眉那肯死謠詠  
大書綱目擬春秋嘉靖二十三年五月十有六

題長蘆漁舫圖

南人結舫如陸居喧嘈盡日蘆花墟兒女赤腳髮不梳船  
尾紛紛巨口魚一生歌笑雲水邊蓴羹鱸飯不值錢綠蓑

青箬隨身具斜雨斜風自在眠  
富釀春醪三百斗醒看青  
天醉擊缶一卷魚經常在手  
生男嫁女秋江口

頌華心芋先生六十壽

先生孝子之子孫不居城市居水村  
鷺脰蕩邊三畝宅芙蓉湖畔六枳園  
今年週甲介初度往事冉冉風燈過  
掉頭不肯就公車落筆何曾屑諛墓  
執經弟子摯虞多階下縱橫書帶羅  
元晏閉門多造請堯夫到處有行窩  
神仙不死原無藥心蔓蔓夷耕且穫  
提攜鴉背鶴頭便鍛鍊凡鉛家火灼  
短舲愛趁鯉魚風來徃霜蘋露華中  
近郭湖山寫蕭照四時煙雨坐龜蒙  
紅蓼紫芋都堪煮飽食東坡鼓敗鼓  
先生收芋在心田六十人猶似處女

同林哲侯章侯昆仲游滄浪亭

桂樹花已落  
笛聲正夕陽  
當年好亭榭  
至竟小滄桑  
詩刻  
篋  
篋竹枿  
欹苔蘚  
床濯纓  
良自好  
底問廣陵王  
魚泝水香  
晚鳴欄  
蘋語卑  
能詩兩  
和靖一  
字竄江  
爲小住  
吳王苑  
來尋長  
史祠  
梅三與  
歐九同  
調復同  
時

發惠麓

一別黃公礪  
征帆高下  
開叢祠  
飛水鶴  
村鼓賣春  
醕水作  
青瑤  
駛山爲  
破墨  
堆稍聞  
鄰舫語  
風雪潤  
州來

呂城

朝辭黃歇浦  
晚泊呂蒙城  
一片平蕪綠  
翛然修竹  
明暗潮  
通水閣  
花鴨避  
船旌何  
處吹橫  
蓬江風  
挾雨聲



丹陽

紅樹丹陽郭濛濛煙水微  
估船吹笛去沙鳥背城飛  
葛令祠墟在將軍廟食稀  
吳志孫弼字叔弼權弟也建安八年以偏將軍領丹陽太守蘭陵  
一樽酒懷古重噓歔

潤州

鐵甕城西月蒼茫獨浪間  
金焦揚子渡吳楚戴公山  
靜夜方舟發臨江飛鳥還  
潮生復潮落催我鬢毛斑

邗江

維舟邗水上斜日下雷塘  
城郭飛江燕人家傍海棠  
至今聞水調何處問迷藏  
來日秦郵路蕭蕭暮吹涼  
渡江猶薄醉醒我廣陵鐘  
名士俱黃土青山閱瘦筇  
過時

春狡獪一宿夢惺忪欲上梅花嶺淒涼衰草封

秦郵

西風吹酒一湖香十五鷓鴣頭喚客嘗鎮日旗翻露筋廟一  
痕濤捲海陵倉人家夜看沙頭月答箸朝收舫尾霜我上  
高臺弔淮海東南國士最堂堂

至淮陰作

橘綠楓丹柿欲緋斷蒲折葦渚依稀枚臯里畔蒼埋屐漂  
母祠前水打扉淮尾雨收船未泊釣臺霜落網初肥渡江  
一事君須記八寶城頭看鴈飛

清江浦

長年船頭作楚語千夫牽船進如堵朝看旗脚動淮城日

午始達清江浦，鼉鳴水底聲。逢逢使者行，符擊衙鼓始知舟。檣駕天上城郭人家，都在釜清江。不清江，非江強名曰江。意良苦，束淮刷黃清濁，爭淮弱黃強魯。吞苜敗槎折竹，駛如飛濺。榜無非沙與土，是淮是河不可知。此事怱怱憾神禹君不見，千艘銜尾屯江干。岸上何人闕虬虎。

### 宿陰平

歲儉不成穫，沙乾不成霧。蒼蒼白屋貧，人語辨村路。舟行畏風水，陸行怯霜露。吁嗟行路難，秦越在跬步。回首江南山依稀，失煙樹。

繁星照櫪馬，荒柝和村碓。登車無百里，已似歷窮塞。展衾就土床，顛倒月初晦。逆旅進不飢，強食屢欲廢。僕夫告揚

幹沙店鷄聲碎

趙北口

行役出瀛鄴夕陽儼畫圖地形垂與際農利浹通沽落日  
明雄縣春風走腐儒停驂楊柳下屠釣亦吾徒

車中書所感

樓桑村邊西日斜車騎廟前飈風鴉雛姬笏酒紅如霞勸  
客一醉能忘家客家何在在兩河僮僕萬指千馬駝纏頭  
拚買舞僮僮能彈趙瑟和秦歌黃金太行相嵯峨朱顏不  
酡將奈何

京邸寄少甫舍弟

人生三萬六千日憂樂各居萬八千嗟余安得若木羽遠

辭鄉邑凌霄煙白日忽不返游子奈少年晨風發發鼓野  
草千里不辨陌與阡孤鴻飛復落鵲鵲鳴可憐有弟天一  
隅魂夢相纏綿魂來清風俱魂去塵暗天醒聞馬嘶草僕  
告囊無錢出門依何依踟躕卜肆前長衢楊柳晴娟娟東  
風捲絮巷陌穿攀條望遠涕泣然便欲南歸少舟楫安得  
夜夜魂夢來君邊

題儀部戴苑齋先生靜退齋詩集後

皓首窮經滯一官向平初願幾曾完趨庭跋涉聽銅鼓議  
禮蹉跎上竹竿老去文園憐骨瘦貧來吏局歎裘寒遺編  
眞歷恒河劫奉作靈光岵嶺看

雄名陡起碎琴餘韋杜流連薄笨車四海論詩求大藥十

年愛士遍春嘘博昌身後寧無客丁令歸來未有居都下  
招紳齊雪涕片言知己最憐予

霧

仲冬天氣煥濕霧埋江干登埤一以眺百里何渺漫但聞  
郭外杵不見烟中繹民租 詔賜半 皇澤如海寬主伯  
與亞旅奔走偕來歡更無澤門哲況有爾庭貺去去任咩  
作勿爲惰農安

雪霽夜望寄內

積雪一千里宵鴻唳杳冥葭添白月白楓掩青山青目斷  
松陵道編殘桑棧經我懷憑尺素魚鴈渺無靈

辜負烏程醞逶遲碧浪舟盛年頻錄別名士例工愁五重

鼎聲細析稀星點稠憶君衾似鐵寒到水邊樓

錦雞

生來無毒有光儀不解山梁舉色斯微步烟塘憐影瘦偶  
嬉叢竹避人遲筠籠明鏡嬌宜舞文距花冠慧易疑鶴自  
愛閑鷗自野輪渠羅綺映歲隄

白鴈

烽烟絕塞照天紅一鴈如銀度遠空粉堞暮笳屯毳帳黃  
沙秋校拓雕弓嗚呼乍起悲涼際點畫難憑浩蕩中萬古  
傷心征戰死倩渠縞素向西風

紅葉

澄江如練散餘霞一樹霜酣二月花名士暮年詞綯爛亂

山行旅路橫斜樓臺金碧斜陽倚笳鼓悲涼遠戍賒一賦  
江南蕭瑟甚白頭庾信向天涯

古詩示少甫

猛虎在深山能使百獸驚志士栖蓬蒿不如負販榮強弱  
勢何定肉食殊不平翁子始微服計吏爾汝聲斗大出金  
印免冠遽逢迎淮陰市上兒袴下王孫行一朝殺龍且遂  
王百二城王齊不足貴功名赫西京丈夫貴自立何苦與  
世爭不然學魯連三言却秦兵翻然蹈滄海舉世稱先生  
由來樊籬鷄詎識黃鵠情

茗城水次輓戴匏齋先生

再拜夕陽下西風灑淚頻博昌終有後北海竟辭賓 聖



代談經叟儀曹臥病身徒留書萬卷不救百年貧

家世曲臺禮由來術湛深驚聞鵬鳥賦淒斷雍門琴塔影  
道場直挾花碧浪陰墓田風復雨秋木響寒岑

窪樽亭

步上瑪瑙坡石路何確犖軟草鋪幽坪細泉奏水樂小憩  
斟窪樽落日孤亭角

明霞墓

生侍石蒲齋死葬峴山土司理是何人片石泐千古曾無  
墮淚碑松風滿樵塢

十錦塘

步出城南門風漪縐明鏡斑斕楓樹紅涌現浮圖競一幅

金粉圖斜陽自孤映

道塲山

雲外望雲中不聞鐘與鼓一霎曼陀花風泉競飛舞欲訪  
王侯家輒復眩門戶

汪藻云游道塲者如入王侯之家

碧浪湖

橙黃橘復綠照此碧玉灣淥淨不可唾明鏡堆煙鬟落日  
漁父曲猶唱西塞山

浮玉埵

亭亭五花亭清切對浮玉西風吹石帆浸破玻璃綠漁郎  
夜篝火驚起旅雁宿

榮性堂集卷一

終

榮性堂集卷二

吳縣吳俊曇繡

古今體詩

爲丹徒道士書屏風

潤州老道士乞我寫黃庭  
薜荔一身綠金焦雙眼青  
掌飛茅洞訣口滑玉樞經  
應有鷺堪換紅舡載雪翎

都下新歸喜薛秀才岳雄過訪

偃蹇盧溝騎淹留杜曲樽  
故人都都不識吾子意何敦  
秋水蒹葭渡西風稻蟹村  
奚奴防客去酒冷爲重溫

靜夜懷丁孝廉琴泉吉水港

五畝松陵宅三年槐市廛

余與琴泉僦舍京師與同寢食者三年

曰歸都似

夢小別便如年倒景垂虹塔斜飛赤馬船相思渺今夕風雨破窓懸

暨陽墨隱和尚枉寄新畫兩幀各題一詩

秋山斜照

楓中蕘豎徑谷口丈人松辣關濃堆紙盤回細有蹤暨陽秋杪鴈江上午時鐘莫作禪師看前身高克恭

江亭雪夜

暮雪誰能畫須從院本尋孤亭對江出一笛向風吟雲木杳無際魚龍蟄自暗當時宋員外八景此陰森

題程上舍光黼鶯脰浪花圖

筍籜青青作帽芙蓉灼灼爲裳手中一卷桑苧枕楞俄頃

羲皇志和扁舟敝漏魯望茶竈低昂有時提壺入市忽然  
赤脚鳴榔平生粗學識字勝他風漢踉蹌

胥江舟次送嚴雅園先生還睢寧

落日照船旌低徊惜別情文章愧知己衣食累書生莫挽

仙舄駐知多驂篠迎黃樓好秋色一舸指彭城

時將先至徐州

聞說清淮漲奔流貫濁河仁能逐蝗虎令可徙龍黿百里  
桑麻壤三年子弟歌政成無所受祇覺一錢多

題張丈心柳畊田識字圖

有書可療俗有粟可療饑清晨荷鋤去日暮行歌歸  
家隣又筆峰耕傍何山麓時時茅檐下抱經跨鰲鯨  
人生多憂患豈在識字初揮地得黃金曾不輟我鋤

大風夜泊昇山下寄內

日暮北風勁蕭條吹我心泊舟昇山下曠望川塗陰林莽  
旣迴薄蒨蒨亦蕭森言辭水晶窟回眄雲峰岑水宿黯初  
別煙餐憊獨吟榜人倚柁語岸火投寺深推蓬成起坐瑟  
瑟迴颿侵寄語寒窓下殷勤拭清砧

寄同年胡孝廉竹坡京邸

辛夷三月開蒨堂鳴鳩欲哺倉鵬忙憶君看花宣南坊秋  
光欲凝遠山碧渚蒲濛濛水煙夕憶君貰酒長安陌吁嗟  
竹坡亦可哀黃金散盡歌虺隤悲涼欲擊漸離筑慷慨還  
登郭隗臺詩成不遇沈僕射頓令水部無顏色相逢游俠  
盡少年黃塵堀堞車輪折與君昨歲桑乾河足寒傷心瘦

馬馱繩床紙帳睡不得雪花飄落紛鴛鴦自別春明淚如  
霰轉眼年光去飛電江村困雨夢惺忪花豎尋春風便旋  
人生當學黃鵠飛鷓鴣一枝焉足依我今掩戶飯藜藿欠  
伸屋矮常噓歔韋杜城南天尺五袞袞諸公氣如虎會當  
席帽度盧溝與君重蹋槐花雨

周漪塘留宿

日落聞犬吠客來方悄然到門星爛爛中夜月娟娟侑以  
纒綢酌眷茲霜露天年豐足秔稻一醉且酣眠  
捲幔看牛斗鷄鳴若木東論交雙鬢黑感遇一燈紅茆屋  
秋風裏陰蟲白露中不須愁出處磨竭命官同

茗上閒居八首和陳舍人雲濤元韻

山腰飛雨山頭泉湖心明月湖尾煙舍人八詠氣橫逸壓  
倒皮陸松陵編

稻熟鱸肥橘墮枝青山紅葉滿城詩茗溪風物般般美不  
到重陽總不知

白雀山中探早梅龍溪七里放船回滿城鐘鼓不知處無  
數飛鴉上埕來

蹋浪叉魚我亦能月湖風急曳船燈高樓西北誰家院齊  
捲珠簾待月升

接果移花趁歲闌雨中手斫竹千竿忽然枯朽出芝菌賺  
得兒童繞圃看

新酒不如老酒醖

潮人呼酒甚質  
新老兩種而已

傾杯乍喜瑪瑙紅武康



竹萌箬溪茗天與詩人配早菰

我夢扁舟美明聖醒來綠綠清茗流借問吳山半輪月何如碧浪萬頃秋

吳興太守是神仙想見坡公作郡年明月清風本無價我來不費一文錢

九日出南門望峴山作

江子滙邊鳬鴈忙紅亭白塢湧蒼茫煙波擁合侍兒塚楓栗叢開逸老堂十日酒卮成底事滿頭黃葉過重陽扁舟更趁南潯釀蓬背霜乾月未央

初見楓葉

陡覺驚心處清霜著樹斑杜司勳作郡蘇玉局遊山斜日

一枝槲寒煙九曲灣往來如一夢詩語綺從刪

陳雲濤舍人同曹習菴編修作潯溪竹枝詞見示卽

用其韻作湖州竹枝詞

桑下籬笆竹外樓駱駝橋畔棹春流喧闐鑼鼓青羅蓋一

隊嬋娟跨紫騮

俗尚賽會儀導中有女郎跨馬扮昭君出塞者

野外都牽薜荔牆鴉鳩聲裏闌旗槍

有山茶

山中一夜春雷

奮不辨龍身黑與黃

有黃龍洞黑龍洞

烏鬼飛飛亂點波菱塘菱浦背船過漁師夜半鳴榔去網

得鱖魚索價多

青塘橋下鱖魚爲一郡之最

如飛兩板櫓聲稠買渡居然坐兩頭

城中往來多用一槳葉小舟僅容兩人

過月河灣九曲

城中有月河九曲灣

柔柔陰裏喚春鳩

村村打麥趁晴忙寂寞空機尚倚牆篋裏裝綿三百縷越商不賣賣吳商

筓牌時節正眠蠶

販筓者以牌爲號

爛煮堆盤客自諳舟出大錢

蓬轉脚乘風一霎到江南

居民多半在菰蒲門外漁航尾繫眾盡道蘇灣風月好不

知天下有西湖

南門外有蘇灣

潮音橋畔秋無極鏡面真同照膽論

潮音橋下薛氏工鑄鏡

差比碧

湖秋雨過一泓些子不留痕

峴山下有碧浪湖澄明可鑑

菱菱深處問蓮莊

趙承旨舊第在月蓮花莊

寂寞鷗波逕已荒不

信老坡還娥媚梳粧臺上野花香

北門城垣上有蘇臺東坡登眺處俗呼爲東坡

臺  
梳粧

霜落全紅橘柚林倩誰粉本細摹臨蔡家園裏看藤桂鎮

日盤桓半畝陰

蔡家園已屬子山錢氏有藤桂二株居人每艷稱之雖無花時亦佳

十月十五夜乘月訪戴秀才晴楓

萬瓦月明中人煙橘柚空塔孤鈴自語山偏樹多風漁火  
悄投岸馮夷寂閉宮來尋賈耘老小閣水西東

船似元真漏詩饒醉守清一州承囊澤雨水貫菰城踞月  
成孤往聽鐘欲二更督郵與從事小飲卽傾甕

余在吳興少甫以和余四絕句見寄復作四絕句答  
之

我如坡老任湖州子似宛邱蘇子由文學典墳書韻籀便  
非鑿齒也長頭

青山黃葉白雲隈一紙新詩讀百回渡口航船如驛騎南  
風吹去北風來

段康亭子斜陽裏何楷山林落葉初問我近來何所作一  
編笠澤注叢書

烏篷七尺雨冥冥越酒三升醉不醒水枕低昂沙向背臥  
看七十二峰青

吳興漫興

文字長楊兼羽獵科舉孝弟與力田鶴鳴自有其子和栢  
悅能令青松妍落日坐水晶宮裏秋風吟金盞山前一卷  
漢書濁酒下舉頭黃葉飛青天

燈火上元蹋燕市鶯花三月游吳趨平生好夢是蕉鹿大

抵世事猶撈菰不如張志和簑笠何妨陸魯望江湖斷當  
筆床茶竈了一舸鷄犬同妻孥

糠粃不能令人瘦飯顆不能令人肥苦吟千言鑿肝腑麗  
句五色矜儷妃書生不見五侯鼎自喜有飽常無饑昨日  
試食熟羊胛夜夢臙神來噓歔

環城皆山石戴土開門望湖水抱沙秋霜先紅楓樹頂明  
月愛傍釣魚槎供饌武康貓頭筍消渴下若鷹爪茶平頭

奴子走問訊詩在鷗波學士家

晴楓家近  
鷗波亭

程秀才明之昆仲邀游鶯脰湖登平波臺卽次丁孝

廉琴泉去年韻

鶯脰湖中渺渺煙風楊露葦釣魚船赤脚吳娃齊蕩槳畫

眉橋下掉青天

昨朝碧浪放船來  
低小烏篷淺窄杯  
忽上平波臺四望  
紙窓八扇一齊開

臨水人家倚晚楓  
短帆婀娜蓼花風  
元真大是多情者  
畱我徘徊夕照中

憐渠多事著緇衣

謂琴泉

喧冷曩今亦已非  
猶有故人狂似

昔月明垂釣藕花磯

觀程秀才懋哉所藏定武蘭亭

世人但學蘭亭面  
而我識面從今朝  
面面相覷久不語  
如塵障眼纏蠨蛸  
恍叅大士手加額  
鼻觀先令氣息調  
歐陽死後千百歲  
鸞漂鳳泊秋迢迢  
形模已數國學本  
肥瘦盡

擬宣和庖此本毋乃神所護針眼蟹爪確可標破盡紛紛  
眞贋解一字何啻千英瑤澄心堂紙堅不蝕錦罽繡襪窮  
飾雕兩頭方幅貝多葉佛香滿屋人天寥細觀骨肉紆且  
直以指畫肚痕已牢東坡魯直好跋識有蘇黃題跋今已截去何人  
割裂竊且逃遺恨得隴尙失蜀庶幾遇之心替陶勸君緘  
裏須秘密神物恐有水火遭

姚秀才繞峰草堂種竹索賦

我住吳興三十日胸中有竹勢萬端參差具作鸞鳳翥欲  
盡未盡徒長歎秀才幽居環堵宅單檐惟有青琅玕播之  
蒼蒼鏗可聽明月入戶篩團圞我來一見快難說肝肺傾  
吐臟腑寬試安茶竈引活火清風颼颼兩腋寒東坡與可



不在世何人解作風雨竿竹枝欲偃復欲仰涼雲瀉地翩  
舞槃竹身貴瘦不貴肥臃當節處亟予刊爲語主人好收  
拾沙培水漑篴籬攔海樓鞋配柳栗杖紅蕉衫稱青釋冠  
十年訪子草堂裏貓頭笋迸脆可剜瀟湘怪底在城市但  
覺一畝煙湯湯

樂觀堂夜讌却懷吳興戴秀才晴楓

座客佯醉主離席落花漠漠飄簾旌中庭嬋娟月光瀉僅  
僕私語絮不明忽然想著戴安道兩肩聳起哦三更東坡  
樊川來贈荅石林文筆通門閤行間蟲行蝕有跡架上鼠  
鬬窾作聲與之一別十晝夜使我汨汨詩腸鳴欲翦吳淞  
半江水寫出望遠懷人情懷之不見坐蕭索嘹唳一聲徂

鴈征

寄內

織雲不動廣寒遙  
知爾焚香撫七條  
風在十三徽上過  
鳳鸞飛下響琴橋

送曹習庵編修假滿還  
朝卽用習庵留別諸同學

元韻

一鴈平皋落木時  
傾城飲餞盡親知  
金亭客去原無淚  
閨苑仙還定有期  
臨別尙留三日語  
感恩新賦七言詩  
玉皇案側添香吏  
肯戀尊鱸狎釣師

熨貼宮袍侍板輿  
留連一舸住吳胥  
蹙拋屋下成林橘  
滿載人間少見書  
十友社中今有幾  
四家詩後更誰如  
筠筒

藥布爲家具到及燕臺欲雪初

畫眉才子好科名簾閣春寒柳絮輕女媚一雙真玉潤婦

翁從古有冰清圖書金粉神仙眷流水桃花鷗鷺盟編修與陳

舍人雲濤同贊於南潯董氏雲濤亦將入京赴職君去玉堂鄰鳳閣兩家贈荅咏

詩聲

黃栗丹楓正晚暉夜船解纜手初揮自今著作惟焚藁一

路恩光看賜衣玉宇瓊樓天上好史才詩筆世間稀長

安倘遇張華海爲語吳儂生計非編修向在京師與同年張少華舍人同居少華

有華海堂詩集

樂觀堂夜坐慨然成詠

家住吳趨佳麗城不知女織與農耕謀生拙有陶元亮逢

世工無馬長卿最好湖山三月暮相逢賓客六朝情明經  
白蠟旁人笑不肯雕蟲誤此生

琴裏難逢鍾子期書中卽解永禪師故知自我難爲古但  
欲求名卽是癡到眼白雲山拓盡打頭黃葉雨催詩閉門  
聞見何曾惡蛩有官商蛛有絲

可憐席帽趁人忙眼看槐花兩度黃日下公卿都愛客江  
東人士易思鄉落英無主飄茵溷噩夢難占幻穀臧捐穰  
歸來無一事手移叢菊待清霜

樓外青山一角偏西風吹冷墨池煙玉堂金殿三生事藥  
鼎茶鐺半世緣短簿祠邊波遶郭要離墳下草粘天故人  
袞袞登臺省一事相望是薦賢

周漪塘以夜泛橫塘有懷詩見寄荅之

問子欲何適孤篷向夜開江南淒欲雪雲抱亂山來迢遞  
橫塘路思維鄧尉梅愁聽戍樓鼓欹枕酌村醅

夜雨憶吳興山水簡諸同志

愁心將夜雨點滴階除間燈光暗虛壁不寐聽潺潺平生  
頗幽閒夙好在佳山峰巒映奇秀林木照芳顏鷄犬通巷  
陌桑麻作闌闔嘉哉二三子昕往曛復還一雨隔三秋虛  
此幽襟間

挂帆白鳥外弄棹青蘋前所遇諒非淺素願寧不然坐泳  
秋光好未覺秋心偏如何此岑寂倏若別經年梧桐隕高  
館楊柳衰通川菊花旣黃落宵鴈征雲天煙波洵浩蕩懷

抱誰爲傳

小雲樓同少甫作

樓閣與雲峨青山照檻多

可眺郭西諸山

夫君居百尺仙子意如

何高樹秋吟雨踈星夜入河絕無人語處時復墮笙歌

偶感

野水荒山欲雪時禽喧木落不勝悲獨行每怯溪風惡短  
艇常愁帆聲去力遲越絕書爲枕中秘松江鱸是枕樓炊年  
來耳覺吳歛熟轉憶牛羊勅勒辭

戴秀才和余奉懷詩見寄復作長句答之

把酒無君便寡歡如何吳越路漫漫  
竭來已逼九秋九書到方知安道安  
紫蟹紅鱗如土賤風蒲水荇際天寒  
具區

三萬六千頃不及詩懷爾許寬

某萁會裏別匆匆

九日與晴楓別

煙樹千重復萬重曉雨空濛江

子滙夕陽明滅法華峯賈收水閣鷗鳬宅沈約南朝詞賦  
宗若使扁舟修傲漏肯從茗雪泛吳淞

喜張上舍松溪自廣陵至

客自廣陵至柴門黃葉飛相看無一語小坐及斜暉馬瘦  
行難好鴻哀侶更稀揚州歌舞地騎鶴悵空歸

送庶常彭鏡瀾先生服闋還朝

文章門地兩嵯峨讀禮功逾服鄭多天上神仙真孝子  
聖朝經術重詞科三吳二月驚黃柳一舸全家鴨綠波此  
去禁林焚藁處芭蕉風戛佩聲和

題蔣青隅戴笠圖

借問蘆中窮士傲舟風雨何堪答言一簑一笠無窮山碧水藍樣製籜皮椰子體貌雪鬚霜髯楚國大夫已矣風波試看江潭

立秋日懷丁孝廉琴泉京邸

兩頭纖纖秋月明井欄梧葉淒有聲念子累舉不得第讀書荒寺守孤檠孤檠不管離別情膏油欲盡雄鷄鳴貴人出郭賞秋去道中怒馬家奴爭可憐五車書在腹日射空厨煙不生

閔香城讀山二秀才自楚歸茗以詩見贈作長句答之



黃鶴樓前鐵笛聲西風催客掛船旌手攜屈子離騷筆身  
到吳興水木城九日登臨千盞盡一家孝友二難并送君  
單舸由拳去千頃滌湖看月明

時將之  
橋李

### 簡戴晴楓杭州

身是林君復家如張志和妻孥梅與鶴風雨笠兼簑寺訪  
南朝舊詩吟北宋多此人游此地無奈別離何

### 送閔香城讀山二秀才之攜李別業

紫冠黃鈿白接離辭賦玲瓏雕臍腑烏巾酒熟乍開顏又  
向鴛鴦弄煙雨秀州城外放鶴洲芋區菜圃思裴休君家  
草堂在何處大抵比鄰鳬與鷗黃童名譽世無敵三年才  
筆江漢滌試聽漁唱釣鼈磯何如黃鶴樓上笛

內子病

浪說黔婁富難禁太常齋貧也原非病憂多不可排徒爲  
井臼婦相對土木骸簾櫳蟲唧唧風雨鷄喈喈檢方自和  
藥畱賓偷典釵牛衣無用泣猶有庾郎鮭

與少甫游慧山

泉與中泠割山拖笠澤迴玲瓏疏地肺跳蕩走晴雷秦塢  
鶯聲滑吳橋燕尾開九龍如撒網風起鶴徘徊形家謂九龍形如撒

網

欲訪春中蹟言尋望礪亭江湖春浩浩吳楚樹冥冥嵐氣  
孤筇濕魚風半嶺腥回頭三萬頃七十二峰青絕頂眺太湖諸山  
漪瀾堂四面面面足清華欲借佛前火閒烹飯後茶手攜

高士傳經宿道人  
家擬似荆門  
味非耶豈是耶

湖北荆門  
州有惠泉

### 晚過月河

城上寒雲布萬鱗  
蕭條霜葦倚風蘋  
爲貪晚景兼貪月  
但見沙鷗不見人  
一派湖山祖天目  
當時湯沐賜春申  
風流二謝顏蘇後  
著我就吟善醉身

### 北固山寺晚眺

半巖幽吹落鐘魚  
脚底帆檣返照初  
吳楚風濤分北固  
金焦蒼翠入南徐  
妙明心証招提境  
篤耨香聞廣大除  
六代當年開府地  
臨江懷古渺愁予

### 京口望月

潤州一尊手未釋  
明月已照江南山  
甘露寺前吹簫築  
壘

步中堂集卷二  
三  
麴戲水鼉鼉頑妙高枯木雨在眼望而不到濁體孱三更  
峭帆指瓜步沙際魚火星斑斑

渡江

顛風三日臨昭關鐵甕城西戍鼓閑倦客又臨揚子渡秋  
雲多傍戴公山迎鑾草樹微茫裏擊楫鼉鼉雜還還去訪  
楊州橋廿四可憐鼓吹竹西灣

由揚州至召伯埭雨宿

廿四橋邊去濛濛雨四垂漁燈明古埭官柳颭神旗悵望  
孟湖色長吟杜牧詩淮南好風景尊酒爲重持

露筋祠

靈旗盡日逐江斜高柳殘陽噪晚鴉翠羽魂歸風似雨白

蓮花遠月籠沙漁郎繫纜飼烏鬼游女褰裳鬪舜華三十  
六湖清見底雁奴魚婢妾生涯

秦郵道中

國士無雙秦少游高臺至竟溯風流津亭日暮蕭蕭雨無  
數飛鴉上客舟

淮南四月響糟床甕社斜陽映驛牆自有明珠鬪新月漁  
巷茅屋借輝光

渡河迎神曲

漕船打鼓迎神君長年稽首牲醴陳檣頭老鴉飛遶巡神  
君來乘黃風龍門碣石東復東霓旌翠羽光熊熊陽侯拜  
舞天吳同呼龍前導蛟除官指揮叱咤資元功一石水五

斗泥神君來兮疾走之鞭沙駕石風馬馳神壽萬歲非有  
期綠章報上天爲垂靈風颯颯飄雲旗

送神曲

鐘桴鼓啞慘不愉金支翠華疑有無翩其逝矣日西連黃  
雲葢天風浪粗神不語兮丹旄掄神之來來何所神之久  
颺迅驚老鳥啄肉鳴匝樹汙泥膠船不可渡

皂河安瀾廟

午雞鳴樹靄蒼蒼淺水平隄艤亂檣蔀屋春祠知楚漢戕  
舸人語雜荆襄時湖北糧艘以廟淺齊時於廟銅山草木青冥裏大澤烟  
霾湍悍旁百里彭城風五兩刷沙行漲正無妨

貓兒窩阻風

風起蘋花亂入床，墨雲飛雨濺紅牆。貓兒窩畔銷魂水，知

我鄉愁是二郎。

前有二郎廟

皂河滑笏碧於油，夾岸叢祠隔樹幽。三暮三朝旗脚反，村人歌笑榜人愁。

### 太白樓

衰柳寒蕪繫客舟，抱城清涕足鳬鷗。竭來憑弔諸任國，無限蒼涼太白樓。天地一樽容薄醉，風騷百尺倚新秋。蒲荒菱熟南池晚，猶有當時主簿不。

樓下卽南池

### 望小洞庭

不見蘇司業，長懷小洞庭。片帆落瀟照，一鳥破空冥。蠶尾明還滅，魚山遠更青。風流五太守，寂寞弔荒坵。

聊城

穹碑三絕眞千古  
矯首還登光岳樓  
日暮聊城颯風雨  
天低渤海洗煩憂  
新泥款段花無礙  
暝樹人家鳥自投  
悵望魯連射書處  
高原殘柳似清秋